

48379

بُزُقٌ فِي الْأَيَّامِ

شعر
أحمد الحديدي

دار روعة للطباعة والنشر والتوزيع
الطبعة الأولى ٢٠١٣-٢٠١٤

"بزق في الأيام"

شعر

أحمد الحديدي

غلاف//إيمان صلاح

الطبعة الأولى ٢٠١٣-٢٠١٤

دار روعة للنشر والتوزيع

المدير العام//هبة الشرقاوي

هاتف//٠١١٤٠١٧٨١٤٤

دارrawaa@yahoo.com

com

رقم الإيداع//٢٠١٣/٨٥٦٤٥

الترقيم الدولي //

978-977-6411-48-7

إهداء

لمن كتب هذا الديوان
أنا.. ومن بعدى الطوفان

بِزُقْ فِ الْأَيَّامِ

عائش حياتي... والسلام
...بِزُقْ فِ الْأَيَّامِ

بافطر بأحلامي

واتعشى برجولتي

وقت النهار باتمنى اموت

وف ليلي اموت عشان انام

عائش حياة بِزُقْ فِ الْأَيَّامِ

حتة خشب عايم أنا ع الموج

...مرة يجبنى يمين

...مرة يجبنى شمال

عايش عشان لغيري أكون شيال

الحلم عفر ع السنين بهجة

الزاوية لو حادة

أضلاعها منفرجة

الحلم زى البنت فى ليلة جواز

عروسة من غير زوج

...وانا... يادوب

حتة خشب وعايمة فوق الموج

بعافر الزمن واعانده بالكسل

...بقلِّب الماضي ف بكره

...واحلى فنجانى بذكره

واعد ف الأيام

يوم مُر يوم تانى عسل

بعافر الزمن واعانده بالكسل

باحاول اهـرب منى أو من أى قيد

والعن أبو العادات على أم التقّاليد

أحب أقرا ف الفلك

نجومه مش غيبه

واحب تربيّة السمك

واكره قوى... صيده

إزاي يكون الطعم خاين

واللى صاد عايش سعيد

والعن أبو العادات على أم التقّاليد

يركبنى عفريت القِصَصِ
الى مانيش فيها
واتعبد المعنى الى ساكن
فى قصيدة بنت
مش عارفة تلقىها
وآه من المعانى بكر
لما بتدلء من الحروف جمل
دافية
وآه من العيون
جَمال لا يُحتمل
صافية

عقلى تعب من توهية التفكير

وصابنى ميت كافية

اليأس بحر... غويط ومُر

لكن أكيد نقطة أمل

كافية

وانا الى متعود على طعم الألم

طول النهار بجرى

أحاول اضحك على الألم

بالليل وانا بدري

واخاف قوى ليجيني ف الأحلام

...عايش حياة... بزق ف الأيام

صنى بنتى

إهداء : منها وإليها

مين اللى قال ان الوطن ضاع ؟!

لاء... ما ضاعش !

دا اللى يفكر يخطفه

مجنون... وجحش

(۱)

أنا ضی بنتی ساعات بتمسك العلم

وتقول هتاف

طبعاً بتهتف ضد إخوان... الندم

أمال تخاف ؟!

بتقول كلام... انا ما أعرفوش

وما قولتهوش

وما لهوش معنى عند عشاق الوشوش

غیران بکره جای لینا اکید بشوش

وانّ العيال

ما بقوش عيال

وما بيخافوش

وان اللى خلف زى دول

طبعًا ما متش

مين اللى قال ان الوطن ضاع؟!

لاء... ما ضاعش!

(٢)

بكره اللّی جای

هیاكد المعنى الى ساكن فى حشای

إن الى داق الثورة راجل

عاش جرىء...هيعيش شهيد...هيموت بطل

أما الى طمعان ف الكراسى

ياكل كراسى

يشرب كراسى

يلبس كراسى دا الكرسى نعش

مين الى قال ان الوطن ضاع ؟!

لاء...ما ضاعش!

لا يا جماعة

كفاية مليانة الكاسات

بالدم مهروس ف الدموع

دا طريقنا رايح...

ما فيهوش رجوع

ويا أما نفضل ف الحارات

واقفين سبوع

أو نبقى نكتب فوق قبور

عمال مصانعنا القديمة

وفلاحينا ف النجوع

يَرْقُدُ هُنَا المَرْحُومُ: فَقِيرُ ابْنِ الْفَقِيرِ

سَبَبُ الْوَفَاةِ :... ((ذَلٌّ وَجُوعٌ))

اصْرُخْ... هَتَافُكَ مَشْ كَلَامْ

لَاءِ دِهْ لَجَامْ

لِيْ يَفْكَرْ يَفْتَرِي... وَيَكُونُ حَمَامْ

يَفْرُدْ جَنَاحَهُ يَطِيرُ لِفَوْقْ

لَا فَيَوْمْ يَمَلْ... وَلَا خَانِقَةُ عِشْ

مَيْنِ الِّيْ قَالْ اَنْ الْوَطْنَ ضَاعَ ؟!

لَاءِ مَا ضَاعَ عِشْ!

دَا الِّيْ يَفْكَرْ يَخْطِفُهُ مَجْنُونْ وَجَحْشْ

عارفة

عارفة ؟...

أنا ممكن أرجع احبك تانى
مش علشان الحب وحشنى
ولا علشانك

ولا علشانى
يمكن علشان التّوهة

الى شايفها ف كل ملامحك؟!
يمكن من حرقه جرحك قلبى

ماقدرتش اسمحك؟!

يمكن سامعك؟!

يمكن شايفك؟!

يمكن فاهمك؟!

كل ده جايز كل ده ممكن

بس أكيد علشان حاسك

عارفة؟...

أنا بعد اتناشر سنة

م البعد المكتوب

قلت اكتب اسمك ف السيرش

على اليوتيوب

فلقيت لك واحد فيديو

من سنتين — عدوا

وانت بتلقى قصيدة

تأكد معنى التّوهة اللى انا حاسوا

مع إنى ...

كنت بادوب ف المعنى

اللى انا سامعه

...مع إنى ...

عارف إن قصدتك عنك

لكن متأكد إنها عنى

مع إنى ...

بعشق صوتك

وكتير توّهنى

بس المرة دى لقتنى بفوق

وف نفس اللحظة انت فصل

وقفت صورة اليوتيوب

وفوجئت إنك لابسة نفس التوب

آخر مرة أشوفك فيها

كروحات أحمر لون الطوب

بعد اتناشر سنة م الذمب

مش هاقدر أتوب...؟!...

عارفة ؟...

انا مش هاقدر احبك تانى

أصلى كتبت اسمك

ف السيرش على الفيس بوك

طلعت ف ثوانى

صفحة مكتوبة باسمك بس بأفتارتانى

أغلى منى ومنك

صورة بنتك

وعنيها بتقولى يا بابا

أنا مش بنتك

...أنا من واحد تانى

وانا عارفة انك ف ثوانى حبتنى
وبعمرك كله حبتها وهى
ماحبتش أبداً غيرك
بس يا ريتها... وبس يا ريتك ...
وانا عارفة كمان إنك مش ممكن تبقى أنا
وساعتها قفلت الايباد
وعرفت ان البعد
بيخلف زيّه بعاد
وسمعت اللحن ف ودنى
فيروز بتغنى
الله يخلي الاولاد

بالأمانة

أما تسكن جوه منه
أما يبقى عرش مملكتك

فحضنه

لما عادى الشمس تخرج من مدارها
برضو عادى ان القمر

ما يجيش ف ديلها

بس هي تغيب ف لحظة

تبقى كارثة

أما يبقى القلب مالىان بالمشاعر

...وانت شاعر

انت شاعر إن أصغر حس فيهم

إن انت بتعشقه
... انت عديت الشعور ده من زمان
الكلام ماعدش يقدر يحتمل

إحساسك انت

لما تبقى ف حضنه هو

ف حضنه جوه

رغم حبك

يجى طيفها وحدة تانية

غير حبيبتك

ببقى لازم أسئلك

بس قولى بالامانة

هى دى

تبقى خيانة...؟...

على الرصيف

فاكريا صاحبي
أما كنا بنجتمع على الرصيف
ونقول أدب
كان الكلام لسه نضيف
وانت السبب

كان النفس دافي
وأغنى واحد فينا كان هاني
أيامها كان حافي

الحلم كان بينا وبينه خطوة واحدة
...ومش بعيدة

ايام ما كنا بنشتمى الحزن
عشان نقوم نكتب قصيدة

دلوقتي حزني فيا نبت
لاء وعشّق ف الحروف
بس القصيدة زى بنت لسه بكر
مكسوفة منى وتستخبي لما بتجها الظروف

أيام زمان كانت جريئة
محبوسة في ذمة قضية
والتهمة كانت... إنها كانت بريئة

فاكر يا صحبي
أما كنا بنختلف
بنشوط ف بعض
وصوتنا يعلا
بس قلبي كان عليك بيرتجف

مين اللى شيل العيال
المسئولية؟!...
مين السبب ف الكره؟!...
القلب ولا نظام رئيس الجمهورية؟!...

لعب خليفة

مين اللى مانع القصيدة
من المرور
حَشِرْها فى زورى
طعم المعانى ملح
وانا اللى مانعنى من الملح المرض
بأمر دكتورى

(١)

كُنَّا لِعَبِّ

من بين لعب ابن الخليفة

لعب علينا كام سنة

أَلعابه لسه معلمة

لِعِبِّ لحد ما تعب

لِعِبِّ وف الآخر هرب

هرب خليف الحكم ومعاه الخليفة

حتى اللعب بييجيها يوم

تصبح مخيفة

(۲)

ممکن تقولی إزای
تقدر ف أيام العَجَب
تحکم لعب ...؟! ...

ممکن تقولی إزای
تأمر حزين يعزف نغم
ترقص عليه ...؟! ...

إزای
تأمر حزين يعزف لك اللحن اللى يفرح
وهو ماسك ناي ...؟! ...
إزای ...؟! ...

إزاي يكون القلب واحد
والجسد مقسوم...؟!...
إزاي يكون اللحن
طالع من مقام جواب صبا
بس الإيقاع مقسوم ...؟!...!

(٣)

بعد الصراع ع السُلطة

والغل الكثير

جربنا ندّي للعب صندوق

وحق تحديد المصير

معلش في ألعاب كثير لا تحترم

بالسخرة تحفر ف القناة

بالسخرة تبني ف الهرم

ايوه الهرم إعجاز

والعجز في بُناه

ديما يكون أصل المرض

متعبي في علبة دَوَاه

(٤)

الرفق باللعب
وَجَب... نعمله جمعية
وبعد ما عام الوطن ف الدم
واليوم صبح
صيد الحرس غيَّة
تعالوا نعمل للشعوب
محمية بيئية

(٥)

إزاي هيحكمنا ابن حنبل

واحنا أحفاد الحنيفة

أكيد هترجع اللعب

لخير أجناد الخليفة **

** جملة (خير أجناد الخليفة) هي أسم ديوان للشاعر مصطفى حسان

كل الحاجات

بشوف بعينك البنات
واعشق ف صوتك السّكات
واتوة ف لفّة رجل واحدة
عارف يا روى إن انت عمية
وخرسة وإنك برضو عرجة
بس حبي غطى على
... كل الحاجات

بعده الطلاق

مُمْكِنُ أَطَوَّلَ شَعْرِي
يُوَصِّلُ تَحْتَ كَتْفِي
سَامِعُكَ هُنَاكَ بِتَقْوَلِ
أَكِيدُ دَا إِنْحِرَافِ
كُلُّ الْإِلَى عَاوِزِهِ
لَمَّا اسْرَحَ شَعْرِبْنَتِي
أَعْرِفُ أَسْرَحَ بِاحْتِرَافِ

ساعات كثير
بقفل عليا الأوضة بالمفتاح
واقعد حزين مسجون
وأقول لبنتي
انى باصلى
يمكن تحس
إن الصلاة أحسن من الكرتون

على مزاجي

عـاـوـز احـبـك عـلـى مـزاجـي
عـطـشـان اـجـيـلـك عـطـشـانـة تـيـجـي
اـصـبـح شـيـطـانـك وـانـت مـلـاكـي
فـي العـتـمـة نـورـي فـ السـلـطـة تـاجـي
حـبـك غـمـرنـي فـفـاـض مـلـاكـي
عـاـوـز احـبـك عـلـى مـزاجـي

خلّيني احبك ... على طرقتي
اتوضّأ بيكي واتمنى ترضى
واشهد بحبك والعشق فرضي
نبتى فيّا ... وإنّتى أرضى
واللى روانى ... أكيد رواكى
عاوز احبك على مزاجى

عاوز ابوسك وبرضو خايف
أدوب فلمسة من الشفايف
لاعدت سامع لاعدت شايف
الكون فارقنى والوقت واقف
فتتوهى منى ... أتوة وراكى
عاوز احبك على مزاجى

عـاـوـز احـبـك بـصـورـة وـاضـحـة
واكتب كتابك دا صفحة صفحة
اغنية عامى ... والثانية فصحة
اكتب بحبك ... تقومى ماسحة
تكتبها روحى ... ومن وراكى

عـاـوـز احـبـك عـلـى مـزاجـى
عطشان أجيلك عطشانة تيجى
اصبح شيطانك وانت ملاكى
فى العتمة نورى ف السُلطة تاجى
حبك غمرنى ففاض ملاكى
عـاـوـز احـبـك عـلـى مـزاجـى

ثلاثية أبوية

مقدمة

((انا مُش ملاك ...))

ومانيش شيطان

ولاحتي كان مفروض أكون زى البشر

انا بس صابنى لعنتى

وصبحت انا

ودا كان قدر...))

القصيدة

لسة مستنى شيطانى يلهم المعنى ف قصيدة

غصب عنه مش بكيفه

داحنا بينا إتفاق وإمضاءات

غصب عنى مش بنقى

بس بتأمر ساعات

ايوه انا حجيت صحيح

انى رجمته ألف مره ف كل يوم

العلاقة بينا اكبر من مجرد

لعنى ليه او إنى أسبُّه فى صلاتى

يمشى هو ويتقمص

العلاقة بينا غصب عنّا

فيها شىء عجيب م الاستدامة

الشيطان مرة اتهطل
بطل يجيني
قمت أنا قررت
اوسوس ف دماغه
قلتلوا أرفع اداان
خليته صلي
واما جت لحظة خشوعه
جبت ابوه

نهاية

((صحيح النفس

أَمَّارة

وديل الكلب ...

أَمَّارة

وطعم الذمب ...

مَرارة

مهيش ساده ولا زيادة

لكن ربك ف مملكته

مالوش نايب ولا سفارة (((

القصيدة ثلاث اجزاء كل جزء موزون على بحر مختلف (الكامل-الرجز-الهمز)

ورا البيان

ورا البيان

موجود كمان

وعود ... ودم

وصولجان

ورا البيان

موجود كمان وعود

ودم وصولجان

وطفل ساند ع الحيطان

نفسه ينام لكن فشر

د انت يا ابني مش بشر

والخلق نايمة ف العسل

اصل العسل ... لزق كفوف

جوّا العسل ممنوع تشوف

وبدون كسوف

وبدون خجل

ما تدري يا بني ف عورتك

دي هدومه خرقة مهذلة

والخلق ساقية بسلسلة

ورا البيان

ورينا خطوة ف المكان ... بس ابتدى

(أ - ب) ثورة

(أ)

٢٠١٠\١\٢٥

اسمع كلام الثورة وارحل يا غبي

الليل يرحل للنهار

دم الشهيد لما بينزف ع الرصيف

يرسم ملامح الانتصار

إياك تكون فاهم هندسى

لاء د أصبح بينا طار

دم اللى مات غرق بلد

لما ابتديت... ضربت نار

وإزاي بعقلك بعد كل اللى حصل

ببرود

تقول نعمل حوار

هو انت فاكر كل مصرى بعد اسمه

ف البطاقة بين قوسين مكتوب (حمار)!

(ب)

٢٠١٣\٦\٣٠

اسمع كلام الثورة وارحل يا غبي

الثورة ما بتعرفش خوف

مش معنى انه بالانتخاب

نديله فرصة مهما خاب

ونقول ظروف

كل الكوارث فيها ريحة حضرتك

يارب ارحم يا رؤوف

الشعب ده الله عليه

ماعدش ينضحك عليه

يا أعمى شوف

هو انت فاكر كل مصرى بعد اسمه

فالبطاقة بين قوسين مكتوب (خرووف)!

يا الله السلامة

لما دى تبقى البداية
(الوسيلة تبقى غاية)
تبقى دى بداية النهاية
وبقى قولوا على البلد
يا الله السلامة

لما يبقى
الفشل دا طبع فيك
وانت عادى
تدعى إنك بطل
لاء وتلقى حد زيك صدقك
تبقى كارثة شعب عايش ف السحاب
أصل راعى
الغنم بيجب معاه حبة كلاب

مش حراسة لاء خيابة
حد فيكم مرة شاف
صبياد يموت بالرصاص
زغلول حمامة
يبقى قولوا على البلد
يالله السلامة
لما يبقى الكون كئيب
وانت السبب
لما تبقى الخنقة نعمة
وانت عن احوالنا تعي
لما تبقى العتمة دارك

لما تبقى المية قاطعه
وانت نهر النيل ده جارك
لما ترجع ناس وتترحم على ايام زمان
يبقى عارك
لما تبقى كل حاجة فى حياتنا
خالية من طعم الكرامة
يبقى قولوا على البلد
يا الله السلامة

انت فاكر نفسك ايه؟!
انت تقدر تعمل ايه?...
جى تقارن نفسك انت ويا غيرك
طب وليه؟!...

انت عامل انجازات ؟!

انت عامل اى حاجة

غير شمالك ف اللى فات؟

الخلاصة والحكاية

لما دى تبقى البداية

(الوسيلة تبقى غاية)

تبقى دى بداية النهاية

وبقى قولوا على البلد

ياالله السلامة

ألا عيب السنين

نفس الشوارع والبيوت

نفس الكلام زاد القلق

وحاجات بتحي علشان تموت

وبشر تموت علشان ورق

في ناس بتصرخ ف السكوت

وحاجات بترفض تتخلق

نفس الاماكن اه صحيح
بس الاسامى ع اليفت
اتغيرت واتلخبطت
أما الى كانوا من زمان متبعترين جوه البيوت
مابقوش خلاص متبعترين
اتكوموا واتبدلوا
اخلاق وناس تانين
ودى حاجة واحدة من الأعيب السنين

كان يا ما كان

كان يا ما كان كان فيه اخوان
شاركوا معانا ف كل ميدان
وأما نجحنا ف عز فرحنا
أكلوا الثورة وحلوا كمان
كان يا ما كان كان فيه اخوان
أكلوا الثورة وحلوا كمان

واما العسكر طقشم فينا
قاموا علينا وفقعوا عنينا
شفطوا المجلس قلبوا علينا
عَرُّوا بناتنا ... ف الميدان
كان يا ما كان كان فيه اخوان
أكلوا الثورة وحلُّوا كمان

ضَحَكُوا علينا وخانو الثورة
أخذوا المجلس كله مقاوله
عند الرئيس ... عملوا مؤامرة
وانتخاباته خدوها كمان
كان يا ما كان كان فيه اخوان
أكلوا الثورة وحلُّوا كمان

جابوا الرئيس قالوا كويس
بس طلع ... دلدول ومهيس
كل مصيبة ... يعك يلىس
ويا الشاطر ... والعريان
كان يا ما كان كان فيه اخوان
أكلوا الثورة وحلوا كمان

لفى يا ساقية ... عبي ودورى
وبدأها بإعلان دستورى
على باب القصر الجمهورى
إضرب على قدر الإيمان
كان يا ما كان كان فيه اخوان
أكلوا الثورة وحلوا كمان

تاجروا بديني ... وف بنزني
ولا مية وكهربا بتجيني
نشفوا دمي الى ف شراييني
قلت تمرد ... مش إحسان
كان يا ما كان كان فيه اخوان
أكلوا الثورة وحلوا كمان

حزب الدكة ... ف ثلاثين ستة
قاله كفاية وخذلك سكة
بس جماعة فضلت ماسكة
طلع السيسى ظرف له بيان
كان يا ما كان كان فيه اخوان
قالوا شرعية ... وقلنا ميدان

تجربة الكتابة المشتركة

كلمات : أحمد الحديدي

والشاعر

أحمد القداح

النيل زرعل

مقدمة

النيل زعل ما اعرفش ليه
ولاعدش يسمع همى ليه
السد زاد من تحت جاب أعلاه واطيه
النيل نجا ولا نجاشى ولا إيه ؟؟

القصيدة

مالك كده وشك كئيب زبي
ماليان تجاعيد الهوى
وبتمشى عكس السير
يمكن تعبت من الطريق
ولاً ضناك الهم ؟!...
طب ما انت عارف أولك
وبإن أخرك يم

هو اللى غرقان جوه فيك

هيحذفك بالطوب ؟!

وانا لما بشكى همى فيك

وعد وعليك مكتوب

مين اللى ناسى الهم مين ؟!...

أنا أصلى ماينساش

مين اللى مالى صفحتك

بالشخبطة ديّه

ومع الأسف ما بتتقراش

انا ماشى بس اليله دى

راجع هنا بكره

عاوز اشوف النيل سعيد

والمية فيه فرحة

أهو مريوم

وكمات ثلاثة

وزدت انا سبعة

ما رضيتش اروح

إلا اما اكون فرحان

انا رحت والبسمة على وشى
زى الكتاب ما يقول
ولقيته قاعد ف المكان

وشه تمام زى
البسمة هى بسمتى

نفس الفرح فرحى
ركزت فيا

عرفت إن النيل حزين

سياسة

ايوه الزمن اتغير
وبيلعب بينا سياسة
واحد أعى
وواحد أخرس
وتالتهم جحش صغير
لما الأعى يشوف بلاوينا يوصفها لصاحبه
واما الأخرس يجى يعبر عن مشكلنا
يشاور برضو لصاحبه
واما التالت يجى يصرح
إن التانى أخرس وان الأول ما بيشفش
يكتشف الكل حقيقة
إن التالت جحش

الملك

الرهان كان الكتابة
لما قلبي كان ملك
كنا مش نافعين ف حاجة
عاش ملك مات الملك
بس فوقنا ... جينا فوقنا
شخص ماشى بدمبك
بعد ما اخلص كتابة
سلموها للملك

* فوقنا: صحننا

** فوقنا: اعلى مننا

يا رب أموت وأنا صغير

أقول الوقت هيمدى
ومهما أقول ولا يآثر
وبرضو العمر بيعدى
ولسّه السكّة بتحير
بتطول هي مع إنه
بيهرب منى وبيقصر
كتير ياخذ ولا بيدى
يا رب أموت وأنا صغير

عندما تبكى اللي نزيك

دلوقتى جاية تعيطى
دلوقتى جاية تعرفى
بأن طعم الذل مُر
والوقت لما يضيع هدر
ساعات يضر
وانّ اللي يغلط
راسه لازم تتحنى

وانّ القرار الى هناخدوا بالغلط

لما بنيجي نصلحه

ندفع بدال الدمع دم

وانّ الحدود الى ف دنياكى

مهبش قلبك وبس

لاء فى حاجات أغلى وأهم

آسف لإنى لما شفت

عنيكى وإنّ بتدّمعى

ماقدرتش اشعرأى حاجة نحيّتك

وليه آسَفُ؟!...!...

وانا اللى عايش عمري كُلُّه

باختصار ضحيتك

انتِ اللى كنتِ حاطة نفسك فوق

عبطُ

وكل كلمة حب اقولها

تفهميها بالغلطُ

ليه كنت شايلك فوق كتافى

وانت موش عاجبك كمان ؟

لاء كنت عايزة تركبى

ع الروس

دلوقت لما بمشى ف مكان وسخ

اكيد ببص

تحتى كتير

لحسن على راسك أدوس

أنا اللّٰى كنت مفهمك بالحب

إن انت ملاك

وكنت واهم نفسى انى من بشر

دلوقت لاء

كله يهون إلا هواك

حتى الدموع

ماعدش ليها ف الجراح أثر

انت خلاص

اصبحتى بالنسبة لى

شئ عيب انى اقوله

الساعة منه بخمسمية ف النظيف

اما اللى زيك

متساويش الليل بطوله

كفنونی هڊوم

الرب واحد يا شقيق
أما الوطن مقسوم
يارب لما اموت ...
يكفنونی هڊوم

إحنا اللي سطرنا
الكلام أسطورة مصرية
إحنا اللي حكينا
...واحنا اللي أَلَّفنا
إحنا اللي غنينا
...وصوتنا خوِّفنا
ولما أخرجنا الثينالة
جت حقيقية

مين اللى كان يقدر يقول
برليف نعدى منه عادى ونخرمه
إحنا اللى أثبتنا البقاء للى خلق
والأقوى لازم نكسره
إحنا اللى عبّينا الميدان أطهر بشر
لجل إن واحد مش عاجبنا
قولنا يالله نغيره

أجددنا لما فكروا يعبروا عن أنفسهم
بنوا الهرم
بس اما حبوا يعبروا عن عجزكم
خلّوا كفن

الرب واحد يا شقيق
أما الوطن مقسوم
يارب لما اموت ...
يكفنونى هدوم

تعريف سريع بالشاعر

أحمد عادل الحديدي

مواليد ٧٦ من مصر (يعني عايش بقالي كتيير...)

الحالة الاجتماعية //

عازب وعندي ۳ عيال ... شہي تمام ... سکر

طلعت كام مرة؟ ... كتيير ... بس الجواز أكثر!

صدق اللي قال إن الحياة حبة حظوظ في مزاد

على زمّتي واحدة ونص ... طب مين يقول أكتر؟

طفولتي // في تشيكوسلوفاكيا ... أيام ماكان اسمها صعب

وشبابي // متمرط ما بين الدول والجنسيات

[illegible]

خريج جامعة المنصورة ١٩٩٨ (بطلوع الروح)

ياما كسبت جوايز أول الجامعة ... عافية كدة .. مانا سنتين أمين

اللجنة الثقافية العليا في الجامعة

وبردو كسبت أول جمهورية جامعات سنة ٩٦ (فصحى) وتاني

جمهورية وزارة الثقافة ٩٨ (عامية) ... بس ماعرفش ليه!!؟

باكل عيشي - المر - من الهندسة المعمارية .. حد لاقى

شغل!!؟

مممكن تلاقيني // فيس بوك - صفحة (الشاعر المهندس أحمد

الحديدي)

أو تتصل وأمرك لله على // ٠١٠٦٦١٧٢٨٨٣

الفهرس

| | |
|----------------------|----|
| بُزُق ف الأيام | ٥ |
| ضى بنتى | ١٠ |
| عارفة | ١٦ |
| بالأمانة | ٢٢ |
| على الرصيف | ٢٤ |
| لعب خليفة | ٢٧ |
| كل الحاجات | ٣٤ |
| بعد الطلاق | ٣٥ |
| على مزاجى | ٣٧ |
| ثلاثية أبدية | ٤٠ |
| ورا البيان | ٤٤ |

- ٤٦ (أ - ب) ثورة
- ٥٠ يا لله السلامة
- ٥٥ ألعيب السنين
- ٥٧ كان يا ما كان
- ٦٢ النيل زعل
- ٦٧ سياسة
- ٦٨ الملك
- ٦٩ يا رب أموت وأنا صغير
- ٧٠ عندما تبكى اللى زيك
- ٧٦ كفتونى هدوم
- ٨٠ تعريف سريع بالشاعر